

四庫全書

集部

欽定四庫全書

龜山集卷三十八

宋楊時撰

詩一

五言古風

此日不再得示同學

此日不再得頽波注扶桑躔躔黃小羣毛髮忽已蒼願
言績學子共惜此日光術業貴及時勉之在青陽行已
慎所之戒哉畏迷方舜跖善利間所差亦毫芒富貴如

浮雲苟得非所臧貧賤豈吾羞逐物乃自戕胼胝秦艱
食一瓢甘糟糠所逢義適然未殊行與臧斯人已云沒
簡編有遺芳希顏亦顏徒要在用心剛譬猶適千里駕
言勿徊徨驅馬日云遠誰謂阻且長末流學多岐倚門
誦韓莊出入方寸間雕鐫事辭章學成欲何用奔趨利
名場挾策博塞游異趣均亡羊我懶心意衰撫事多遺
忘念子方妙齡壯圖宜自彊至寶在高深不憚勤梯航
茫茫定何求所得安能常萬物備吾身求得舍即亡鷄

犬猶知尋自棄良可傷欲為君子儒勿謂予言狂

嚴陵釣臺

漢綱久陵遲國柄授權室中興得英主威明戒前失三公經邦手吏事困精覈功臣欲圖全猶不任以職矧茲故人分義等天倫戚卓哉子陵心秉哲固前識投身豢名爵豈得枉尋尺萬鍾雖云富樊雉非予匹石瀨清且泚蒼崖聳而直投竿事幽尋釣水鮮可食羊裘御冬溫裘繡未云益三旌屠羊肆義在不吾易用舍各有趣高

風亘今昔

冬至日聞雷

土圭日已南百年生有期新陽潛地脉慘慘羣陰微尚
覺雲氣昏嚴飈弄寒威狂雷與驟雨奔逐如喧鼙百蟲
誤驚蟄生理亦已虧向晚怒聲息霰雪交餘輝凌寒山
驛孤持盃空自疑

土屋

土屋枕荒陂周回僅容席環堵異營窟猶遺古風質功

雖勞版築身自有餘力依戶鑿圓竇寒光度如璧戶開
迎溫風冬瑾可棲息胡為棟宇麗但免風雨阨安居自
寬暇見者徒逼仄寄言鄰舍翁各自適汝適慎勿慕華
屋澆漓非至德

久不得家書

駭彼晨風飛日暮歸鬱林游子尚何得但寄千里心庭
闈斑白親憶念我亦深云何彼無耗徒役夢寐尋有如
在空谷歲久想足音竹篇一行書貴可抵萬金跼蹐步

前庭復坐口欲瘖淚墮不自知便覺盈衣襟人生本無
待豈受外物侵歸當卧牛衣竹籜橫荆簪

藏春峽

六咏有序

國華先生得幽谷於劍水之東去其所居僅一里
餘負山之巔闢地西向為堂名曰咏歸堂堂下有
亭曰老圃亭之前有跡穿數畦其南北有二茅亭
南植梅數株名曰暗香北種紫竹數竿名曰虚心
又其南有一石竇其下可容數人名曰容照巖合

而名之藏春峽

其暗香亭以下四
咏見七言絕句類

結廬東山阿屹然俯全閩下有黃龍淵浮光抱層雲彼
美谷口翁杖策來往頻明月自為友顧影相為鄰擷芷
佩芳蘭不與麋鹿羣虛堂發輝素黃卷日相親采薇芼
晨羹弋鳧侑清樽曝日負巖竇為童浴溪濱微吟曳雙
屐踏破青苔紋歸與自樂只此意將誰論點狂聖所與

聊欲繼餘芬

右詠歸堂

昔君居隱鱗投竿拂珊瑚

國華故居有隱鱗
洞洞前有釣臺

今來寓谷

口結亭事春鋤亭下十餘畦蔚蔚富嘉蔬野果銜米糝
蔓實垂青桴籬根有蹲鴟晨炊勝彫胡豈惟充君腹鄰
里亦厭餘疏泉動地脉磽确成膏腴諒彼漢陰人假脩
匪吾徒避俗柴桑翁不復嘆荒蕪卷懷經綸手治平此
一畝居知子非隱淪聊以寓壯圖人生出處分禮義安
可踰茲謀異樊須甘事小人儒

右老圃亭

送虔守楚大夫

元祐戊辰

象緯辰心次雄都水濁時經天浮瑞彩絕代出英姿厚

德千金壁虛懷萬頃波
霜蹄來漢苑雲翮上天池
籍籍才猷美皇皇使節馳
飛書騰衆吻橫寔通達剖竹章

流遠還車蜀道巖

除成都憲以臺章罷得度守

秦庭徒被指趙壁本

無虧黃霸初勤細裴公可範規
惠流三郡俗名掩四賢

祠大厦資梁棟承桃賴鼎彝會須紆
袞繡寧久駐旌麾

畫航行空挽甘棠去益思烟波迎
棹急江柳拂墻低賤

士行藏拙參軍秩序卑生涯惟蠹簡
事業付毛錐懶惰

文園病伶仃曼倩飢自甘同跛鼈未
忍舍靈龜朽質難

雕繪餘生辱品題
寒英回暖律陰壑
得晴曦終愧麈頭
賤難酬國士知
兩行淵客淚感激
自沾頤

縣齋書事寄張世賢

朝衙羣吏集戢戢
同隊魚暮衙羣吏
散翩翩若驚鳧歸
來坐虛室開編對
璫璵啓戶間無人
清風入吾廬持盃
邀明月大嚼時與
俱蹀躞步松陰對
影聊相娛嗟予懶
惰久濶畧與世踈
故人隔清湘懷抱
何由舒為問魯山
翁此意今何如

黃彥昭時思閣

前有連理檜

孤丘鎖千岑層閣跨雲起永懷霜露思時未薦醪醴欽
宗貴收族蟄蟄神亦喜故令傲霜根駢枝復連理黃侯
渥洼種一躍不容擬慶源如歸墟萬壑自奔止終見君
子鄉乃是鳴珂里

江陵令張景常萬卷堂

民生結繩初異宇本同體誰令四目翁破肉作瘡痂龍
龜出河洛茲理固天啟張侯瑚璉姿高步軼前軌買書

費千金充屋未云已六經瀟溟渤百家襟原委中流湧
千波舉體惟一水參前有真趣萬古一憑几毫端吐奇
芬溢目麗紈綺微言窺聖域妙應期得髓默坐筌蹄忘
斯文亦糠粃

送蔡安禮

眷言與君違寤寐念往昔結歡自童稚分比膠投漆非
離成參商出沒俱齊汨羲和鞭日御過眼飛鳥疾五載
一相逢俯仰如昨日論情方縑縑念子又何適行矣不

可留惆恍心若失人生惟所遇行止或使尼况復各宦
遊聚散何可一嚶嚶黃鳥聲上下求其匹俛首聽遺音
飄零淚橫臆

題愚齋

溪東黃室

結廬依林丘回峰爭盤紆下闕清池淵憑軒數游魚飛
閣出雲表浮烟襲簪裾中有傲世士脫畧自謂愚高義
輕羸金貽謀有詩書青編富充宇散秩羅瓊瑤鱗鱗壁
間題一一露珊瑚嗟予久昏塞荒蹊少耘鋤昌黎已隔

世將焉問夷塗道逢北山公荷鍾時與俱皎皎河曲叟
朋儕共款獻高齋一來遊豁然心神舒籬東有餘址誰
能難榛蕪結茅可容席一瓢來此居寄謝陶彭澤何必
愛吾廬

童氏必大亭

生前作此亭

迢遙武夷翁霞衣爛朝日作亭依雲根曠望茲焉息仙
游去不返孤丘已陳迹身雖隸編齊貽謀有遺則慶流
終必大名亭以為識伊昔晉公堂三槐手親植扶踈滿

庭陰貂蟬映圭壁，默視天人際。召應齊呂律，閤門容軒
車。茲理固可必，終見童氏里。嗚珂聲赫奕。

江上晚步

赴荆南詩

鏡潭磨青空，璧月侵江淥。攬衣弄清泚，烟烟月在掬。冷
然適我口，肝膈貯冰玉。流光頃百變，一玩不可復。歸來
盡餘樽，醉卧媚幽獨。羲娥偶相憐，歲往如破竹。餘生枕
中付，勿問黃梁熟。

荊州偶作

鄭公嵇阮流野性本麋鹿平生傲羲皇白首就羈束大
寒客無羶官冷飯不足顧予支離人攘臂受餘粟江魚
尾盈尺飽食勝梁肉荆山富樵蘇丈室有餘燠頑踈愧
前哲所得踰往躅談經追時好俯仰負愧忸流光逝不
反愁鬢日改綠世道劫火燃不燔乃良玉晚交定難恃
雲雨手翻覆官居直遽廬束擔聊託宿求田意雖鄙此
計正宜速歸尋谷口耕勝賣成都卜坐想帶經鋤倚耒
聽布穀

送鄭季常赴大學正

修

驅車出西城眷言與君違
北顧臨康衢問子將焉之
赤驥度渥洼終當飲瑤池
成都九軌道一躍不可追
浮塵暗荆棘捷徑行多迷
長風戰秋林零露沾人衣
青松不改柯期子清霜時

次韻何吉老遊金鑾寺

榮名嗟何為病木自生癭
彭殤一夢覺烏用論久頃
寄身淵明廬翛然在人境
衛生鄙樊雉放浪任流梗
相忘

到形影世累不須屏劉鍼聊自營寧復事干請負暄有
餘燠蓬髮亂垂頸客來坐無羶誰顧廣文冷忽聞過吾
門冠屨不暇整邀我招提游並轡相與騁僧關叩禪寂
未語心已領竝游皆韓徒辭刃淬鋒穎多聞富如坻吾
方拾遺秉顧慙管窺陋未覩豹文炳謬追俊游後如渴
得甘井願從借金篋為割眼中膏鼻端堊墁久妙質愧
非郢賡酬困詩律恐坐杜陵瘡相攜上層崗出戶畏深
窵每虞參也魯跬步輒三省遲回月初上雲間掛金餅

昏鴉鳴相呼更覺林逾靜湖光湛星漢渺渺天水永歸
蹊暗塵土回首失清景角聲下譙門歸步怯脩嶺晚市

人迹稀青燈耿踈影

金鑾有退之題名
故有韓徒之句

送趙循道赴都講

南陵人

鳳山鬱崔嵬下有千頃陂

南陵鳳山大
農陂溉田千頃

峻極不可攀

浮光亘長鬢晦冥滴風雨澄淡含瓌竒吸呼入君懷萬
態羅心脾吐辭麗金腹煥若星斗垂竭來荆渚游紅蕖
照清漪故宮久零落一酒增余輝惇族貴老成堯言下

丹墀浮駮駕雲帆
眷然成化離長裾
曳王門豈比困鹽
虀驂駟踏長坂
萬里誰能羈

送胡康侯使湖南

北溟有潛鱗其廣數千里
揚鬣厲東海汎汎等蜉蟻
百川競奔注漫不見涯涘
寄之天地間大澤碧空耳
胡侯荆山資妙質久礪砥
飛聲動旒冕持節照湘水
功名與時會事道從此始
驂駟駕輕車夷路道九軌
朝燕暮騰越快意未為喜
聖門學須彊一簣虧可耻
擴之天地寬

於道乃云邇為士貴弘毅無忘味斯旨

寄題趙貫道後樂亭

亭在沂州新泰縣

叢祠有狐鳴羣雛滿東州彬彬齊魯郊不復論軻丘鼓
刀販繒翁袞袞封公侯風流日凋弊世久俗益偷昔時
戴經人輟耕仍佩牛推埋晝行盜閭里更相讎趙子尉
平陽始止惟民憂百花爛成園幽禽哢春柔問子胡不
樂我心殊未休威明揉彊梗驕鷹化為鳩買犢解吳鉤
束身自鋤耰田廬戶無樞長物棄不收結亭自樂只開

編玩前修誰云酸寒吏憂樂非身謀乃知君子懷與世
異沉浮嗟予一漫叟放浪猶虛舟舞雩有清風遺迹今
在不君乎去此矣欲往將誰倚寄言春服成尚覲一來
游

謝詹司業送酒

鄭公負才名流落四十年高視隘八荒天寒坐無羶忘
形賴司業時與送酒錢嗟予樗櫟材臃腫世所捐云何
附青雲拜賜追前賢開壺對青樽內愧顏覲然公乎廊

廟姿直幹上參天
衽服羣娃宮不虞
姑爭妍驩騶誤一
蹶萬里終騰騫
朝燕暮刷越
駑馬安能先
玉瑩本無瑕
寧須事磨鐫
宣室久虛席
茲行定詳延
陋儒氣填臆
感慨聊自宣
辱惠不知報
強歌成短篇

戲贈詹安世

善談兵慕耿弇之為人故有虎牙之句

綵舟駐閭門
初與子相識
長空蒼秋隼
爽氣橫八極
擣辭鏤圭璋
吐論森劔戟
鄧侯不願仕
志在書竹帛
長纓係單于
落落蘊奇策
氣吞流沙外
意無燕然北
虎牙有

餘勇邊塞失疆敵會當朔風勁仗鉞控鳴鏑老夫慙衰
謝見子徒感激平生謬經綸此意已寥寂信哉功名會
事道古難必窮通付時命未足為悅戚餘生如甕鼠滿
腹微分畢行矣脫簪纓翛然適吾適

安世乃司業之
子年少未受官

隱几

上天不殞霜萬木正鮮澤青蒿與長松各挺歲寒節朔
風吹沙寒高嶺凍積雪萬木已摧落長松獨清潔人生
無艱危君子竟何別隱几試澄思行藏易差轍

留別富宣德

富侯荆山姿落落混燕石
錫磨經世故不磷乃天質
軒裳儻來寄既去寧須戚
驂騑走長坂一跌未為失
秦庭謬瑕疵睨柱終完璧
君子有遠懷事道先器識
干鈞等鴻毛始見烏獲力
行矣各勉旃他時賴三益

別西齋諸友

浮雲如積酥涼颯勁絃疾
溶溶渺天末飄忽易相失
懸弧四方志匏繫非予匹
平生結歡久始願膠投漆
別離

傷素懷此身任萍迹

遣懷

君子雖自嚴至潔宜若汙昭揭日月所向將蝟如天
地一窅中逼仄身亦孤游世在虛已浩蕩與時俱靈府
有天游環中真道樞

元豐壬戌歲暮書事

閩陬地力盡種藝被山谷涵濡一雨潤鬱鬱原野綠春
風忽云徂舒景變炎燠涼飈動地軸擘斂何神速坐愁

林巒空俯視萬木禿凝霜借風力摧折到松竹嗟予閉
門人感此亦愁蹙幽庭有萱草采采不盈掬如聞糟牀
注取醉須百斛沉酣樂時運天關不須觸萬物一芻狗
蒼蒼自高目

綠漪軒

開池傍清軒環除種蘭芷虛明淡星漢踈影薦鳧履君
乎試憑軒鑑此亭下水盪風生微瀾風定還泚泚悠然
得真趣吉祥來止止

迂疎堂

終南有捷徑屈躄終當伸君獨耻不蹈安得與世親結
廬寄人寰獨往寧問津形影廢酬贈相忘誰與隣寄謝
漢陰叟抱甕良非真

鄱陽湖觀打魚

小龍廟在湖上
崇寧壬午

秋高水初落鱗介滿沙脊浩如太倉粟寧復數以粒紛
紛漁舟子疑若俛可拾橫湖沉密網脫漏百無十蟲鰕
雜魴鯉駢首吐微濕小人利口實刀杙汗鱗鬣鯢鯨亦

狼狽風雨移窟宅玉淵有神祠變化在噓吸胡寧飽羶
香忍視萬魚急幽潛不足恃感嘆百憂集寄謝漆園吏
於計未為得

送嚴尉

世路久艱棘青冥翳妖氛孤鳥叢祠中豺虎填城闌君
能摘姦伏竭澤無潛鱗勿云功未酬屈蠖終當伸飛黃
駕輕車一躍窮無垠

檢田

尋崙上層崗隨衝出高原烟火一里餘雞犬遙相聞瘠壤僅容席訟牒徒紛綸齊魏兩蝸角况復三家村舉世競豪末薄俗寧足論吾哀過元亮欲辨已忘言

送向和卿還京

子韶

江湖多秋風愴恍夜不眠念子將北歸起視明星懸君平翠蚪姿聳身蒼梧淵高步隘八區凌風上青天妙質蘊荆璞寧須事磨鐫贈言以為別妄意追前賢聖言乃常珍含咀真味全奇辭暫時好過眼如飛烟潔身忌廉

潔觸物冥虛船吾方病羸
芥市藥還自憐明日隔長
陂相望空惘然

龜山集卷三十八

欽定四庫全書

龜山集卷三十九

宋楊時撰

詩二

七言古風

酬林志寧

志寧從學河南二程先生

君不見昔時卜年公
圻龜食墨瀍澗東
伊流洛水環紫
宮
廣輪千里天地中
真人一往不復見
鼎湖弓劍空遺
蹤
陰陽所交風雨會
和氣自古生英雄
邇來百千歲零

落多奇窮鳴臯少室崢嶸倚天闕下有回淵萬仞蟠雙
龍蒸雲結雨氣濛濛惟有蒼髯紫頷包玄珠時發光燄
凌烟虹成周太平鬱餘策但令洙泗生清風羨君妙齡
有仙骨乘槎暗與天潢通萬里不一息去若孤征鴻決
開銀河浪分出一派懸秋空顧予山野姿未老心已慵
謬從君子游營道術偶同有如退之與東野自慙青蒿
倚長松感君忠然抵山谷開談冰雪清吾眉高堂黑髮
顏如童未須念此心忡忡幸有山前清泉冷可酌與君

啜甘茹草忘春冬

題贈吳國華釣臺

國華自作記
不取嚴陵

君不見釣璜溪上白髮翁一竿西去追冥鴻
田車同載非羸能鷹揚烈飛如飄風
又不見羊裘石瀨垂綸叟爽槩凌天動星斗
萬乘故人親訪求卧對鑿輿忍回首
聖賢遇合自有時潔身亂倫非所知
高風寥寥古已往較然得失知者誰
君有釣臺臨橋水橋溪不與桐溪比
叔身欲攝渭老蹤笑撫長髯照清泚
澄潭夜月秋光浮撒

波短艇沿汀洲長繩巨石不能繫飛帆片席歸蓬丘巨
鈎沉餌牽九牛一鈎直掣金鰲頭脩鱗擺鬣浪山起雲
鵬飛翻忽千里跨雲憑翼上青冥一點孤光劍箕尾

贈別蔡武子被誣得釋赴泉州錄參

君不見馬伏波後車薏苡珠璣多又不見章臺秦壁非
有疵相如謬使秦人疑匡章不孝通國非世無孟子知
者誰惜君高材兼衆美完德從來速招毀含沙怒欲陰
中之剛引涇流汙清泚輕雲捲盡天日明容光竅穴無

潛形刮磨玉瑩冰雪凝楚人謾費塗丹青齊庭有鳥久
不鳴會須一舉天衢亨北溟歛起風雷驚修鱗巨鬣隨
波輕不須回首顧潛鯨好乘扶搖九萬里奮迅六翮飛
南溟

入山行

蒼崖峭立青天涯古徑蕪沒沿清溪深林四合晝亦暝
寂寂惟有哀猿啼野人心形灰死如槁木山禽見之猶
驚飛因嗟太古不可復我無機械胡相疑

假山

衡湘側南二千里清淑之氣常蜿蜒丹沙玉石氣所感
融結萬狀非磨鑄窮源荒蹊異岱畎不逢禹績輕棄捐
苔封土蝕誰復問嶙峋僵卧當市廛龜山老叟見之喜
鳩徒輦置羅前軒岩堯孤峯露仙掌有一石如掌屹若太華
青摩天傾崖斷壑坐中見葱蒨似玉生雲烟初疑祖龍
未死日浮梁擬跨咸池淵神號鬼怒驅不前捶擊剜磷
成衿園又疑巨人出龍伯揭竿來自崑崙巔連鼇合負

雲濤翻蓬壺簸蕩留平川繫予竟日倚欄檻矯首使欲
追靈仙尻輪神馬自足駕已覺兩腋風冷然瓊臺浮游
與世隔醉傲笑拊洪崖肩山間草木即靈餌含英茹實
資長年悠悠廣息變今古坐看溟渤成桑田

寄練子安教授

憶昨吾子客上都我獨奔走天南隅各年未壯已多累
誤投世網身繫拘飄零今日偶相值乃復咫尺不得與
子俱人生委質金在爐大冶鼓鑄誰號呼惟愁跋跋走

塵土舊業已廢成荒蕪惜君高才卓犖與世畸雄文洒
落珠陸離雷驚雷赫轉坤軸風號浪擊飛天池珊瑚挺
幹滄海竭騏驎超軼不可羈經綸有道世莫知櫝中良
璧始自竒君不見扶藜隘巷蓬萊居短褐甕牖桑為樞
擁門軒蓋何所慕藜根自飽非癯如又不見揚雄寂寞
守太玄棄捐覆瓿真可憐折腰小吏昔所恥田園須賦
歸來篇終當結屋蒼屋巔期子相與臨清泉投簪解帶
謝人世拂塵披蠹親遺編松皴檜老生青烟雨餘風弄

鳴哀絃低回野興有真意浮名鸛雀過吾前結歡膠漆
常連連從游鹿豕終長年

送富朝奉還闕

紹榮字國華

君不見慶厯承平道如砥馳車八荒同一軌邊人鷓張
怒螳臂百萬雲屯若封豕又不見朔方橫流漲天起腐
麥蛾飛木生可扶攜道路雜老幼操瓢溝中半為鬼關
河日夜刁斗驚嫚書乘駟來渝平兵間持節得英傑談
笑坐使羈長纓青社環城萬區屋發廩分曹具饘粥饑

羸枯頰陡生光叢塚不聞新鬼哭臧孫有後天匪親閭
門容車何足論竭來灘上見猶子雄姿宛有典型存驂
騮已渡渥洼水朝燕暮越應千里行看玉勒駕鑾輿濯
足瑤池從此始

南康值雨

廬山卧龍菴有劉道人自云百餘歲
碧眼不粒食惟食栢飲水每客至必

先知之欲往見之
不果故并記之

平沙漲雪清江瀆水花照日紅生鱗軒然五老出城表
雕玉萬仞窺長身雲巾星弁覆華頂飛泉漱瀑垂天紳

平生未識廬山面碧巘橫雲望中見江頭一夜雨銜天
奔浪號風作悲律朝來淤泥沒牛馬咫尺坐論千里遠
芒鞋拄杖掛塵屋神馬尻輪歛飛轉卧龍菴前碧眼翁
日飲山渌滄溪松神融氣合八荒外此心炯炯宜先通
未須勒移却俗駕會應一洗塵寰空寄言歸侍壺丘子
他日來游當御風

遊武夷

是日泛小舟至雞窠岩還遊冲佑觀

函關崎嶇走秦鹿天下並逐爭羣雄抉雲翻空鱉足折

黔黎竄伏如寒蛩武夷山深水清泚避世猶有高人蹤

龍泓東注海波涌

嶺有投龍池世傳與海通

玉女翠擁秋雲鬆

玉女峯

赤霄真骨寫虛壁通泉凡筆慙非工

魏王峯前有畫鶴

藏舟浮

梁跨絕壑

山間有小橋橋西有一小舟皆人跡不可到

隱見似與天潢通當

時雞犬不復見窠巖依舊烟霞籠我來秋杪月既望尚

有幽菊埋榛叢天容洗淨雨新霽雲幕四卷清無風掀

蓬進棹窮異境注目想見流殘紅回船杖屨躡幽徑松

竹窈窕環琳宮翠琬溫辭耀華袞

襄詔有石刻

金榜大字纏

交龍自憐病骨掛塵網慢亭高會何由逢解衣歸卧玉
瑣碎仰看明月穿疎篷

向和卿覽余詩見贈次韻奉酬

杜陵頭白長昏昏海圖舊繡冬不溫更遭惡卧布衾裂
盡室受凍憂黎元詩人窮愁自古爾豈若種藝依青門
嗟予老懶世不用窮巷久雨無高軒蟲鳴鳥噪感時節
髮不恤緯羞前言殘章斷簡棄不錄自愧潢潦無根源
君胡袞字富褒飾三復妙語將誰論知君獨負青雲器

欲使饑者名長存

贈程舍人近侍入閩

路公溪上鶴髮翁
眼光照日顏如童
厖眉垂髮有仙骨
駢集五福天所鍾
螭頭暫輟三長手
杖節扶輿入閩嶠
弧南一夜晶輝浮
海隅草木俱榮耀
朱金拜後古所稀
繡紱全勝衣綵衣
玉觴薦壽須珍竒
更待蟠桃結子時

岳陽書事

洞庭水落洲渚出
疊翠疏峯遠烟沒
重樓百尺壓高城

畫棟沉沉倚天闕湖光上下天水融中以日月分西東
氣凌雲夢吞八九欲與溟渤爭雌雄澄瀾無風雨新霽
一日萬頃磨青銅琉璃夜影貯星漢騎鯨已在銀河中

湘妃帝子昔何許但有林壑青浮空

君山世傳湘君居此因以得名蒼

梧雲深不可見遺恨千古嗟何窮須臾晦冥各異色風
怒濤翻際天黑乘陵瀨壑走魑魅溇瀄百怪誰能測忽
看舟子玩行險更欲飛帆借風力安得晴雲萬里開依
舊寒光浸虛碧

遣興

嵩華千仞立不碍天地寬
涇渭清濁流不離海波瀾
人生過眼萬事役記憶細
故真童頑

寄游定夫

憶昨相逢鳳山趾
駒隙駸駸餘半紀
君趨烏府近清光
陸海驚濤漲天起
雲帆大舸半摧溺
艤岸得全誠偶爾
我時捧檄赴京渚
放浪江湖一浮蟻
談書考古老無用
哺啜糟醅咀糠粃
東歸雖復有民社
為米折腰良可恥

市朝紛紛真羿穀朔幹燕弧不容擬投身中地竟誰免
未信棘端能捍矢重樓百尺卧玄德問舍求田不須鄙
早歲結鄰初有約齒豁頭童今老矣築田預想傍田廬
負耒耦耕何日始

過錢塘江迎潮

銀潢翻空際天白鯤怒鵬騫海波擊湧雲噫氣聲怒號
萬馬馳車隨霹靂低昂上下如桔槔頃刻性命輕鴻毛
賈囊負笈有夷路一日何事常千艘因思羊腸盤九坂

攀援蜀道愁狢獠人生觸處有萬險豈必此地多風濤
願言夷險不須問莫負對酒持霜螯

觀獵

貂裘白馬誰家子擁戟弦弧囊勁矢塞身欲與鳥爭飛
觸處塵埃雲四起長繩驅逐狐兔驚鷹隼擊臂流雙睛
飛揚雲間電光閃旋復草際無遺生鷲腸久厭鮮肥餌
顧盼方能伺人意但矜鼎俎有餘甘貪餐誰憐殄生類
安得淑氣回巖秋徐令困拙同鳴鳩林間百鳥恣孳乳

雖欲擊搏知無由

寄范正甫

時討西夏

羈窮莫厭如牢圈從古功名出屠販男兒不負懸弧心

馬草裹尸猶足願君不見淮陰寄食饑負叟

一作竊瓜寄食淮陰

叟胯下英風亦何有逢時吐氣雷電奔金印纍纍大如

斗玉門晝夜羽檄驚睥睨欲整天都城叩關虎士鬱餘

怒科頭奮戟如鷗鷹君從壯年蘊竒策未宜縮首藏柴

荆昔人投筆真豪英慨然萬里終成名南山白額雖欲

老百獸遭之猶裂腦

吳子正招飲時權酒局不赴作詩戲之

寒爐火冷浮青烟勁風刮面如戈鋌凝陰不動天欲雪
竟日兀兀成拘攣廣文才名四十年天寒坐客猶無羶
叅軍官小技能薄寂寞冷坐誠宜然忘形杜老偶相覓
傳呼歌舞開華筵嗟予簡書固可畏不得對飲簷花前
謾有糟漿逆人鼻汝陽口角空流涎可能更似蘇司業
只與時時送酒錢

寄題環翠樓

記云唐君作此樓以奉親

方壺七萬神鰲連瓊臺縹緲居靈仙鯨翻海運成桑田
異境誰使夸娥遷銛鋒四面蒼圭圓巨靈巧以青瑤鑿
揉風洗雨淨娟娟修眉浮空秀爭妍清溪回旋瀉幽泉
下有澄瀾湛洄淵繡楣雕欄欲飛翻凌切漢道摩皇躔
恍如直跨須彌巔琉璃凝光圍四天喜君妙齡謝世喧
萱堂慈顏白盈顛兒童牽衣戲踟躕優哉此樂誰與先
嗟予昔以三釜懸投身世網百慮煎今乎老矣誠可憐

狙猿何用簪纓纏子雲終須守一廬誅茅結屋纔數椽
薜衣雜佩紉蘭荃手披白蟬玩青編春暉不報常歛然
雖有至樂安能全

晚雨

斷霞明滅天日黥雨意晴暉爭好醜浮雲冉冉無定姿
白衣忽變如蒼狗悲風激烈河漢翻雨脚如麻飛霰寒
山深氣腥豺虎亂乾坤四合誰云寬將溪溪上野客懶
成癖怯寒手攣面如墨把盃強吞僵立歌閉門獨愁天

已黑

贈醫者鄧獻匡

天地一氣猶治甄埏埴萬彙隨方圓神形九藏通關野
八風中物如戈鋌天元玉冊有遺義探索始自三皇前
桑君越人不世出鏡石鍼灸誰能傳賤工增餘損不足
往往橫天殘天年羨君妙齡踵其學至理隱贖常精研
間陰得陽以神遇反視方術猶蹄筌道關藿即為餌
車上已有長蛇懸嗟予羸荅苦多病維摩丈室方蕭然

願君速已天下疾為予一洗沉痾痊

與將樂令會飲揖仙亭

灘流斗落惟璠璣雕欄照水光如濡層巒疊嶂爭蟠紆
翠岩百尺蹲於菟何年巨人出歸墟揭竿合負神鰲趨
飄流人間峙蓬壺至今猶為仙聖居飛軒往來誰與俱
下有馴雉隨雙鳧英風爽氣凌清虛榻間新詩露珊瑚
顧余老懶與世踈欲往勾漏嗟無徒會須策轡追雲車
無使吃口啗癯儒

五言古

離家作二首

庚申
歲作

敗葉辭故枝驚颺送微雨
田廬向收穫城中亟完補游
子欲何之道路修且阻
俛首謝田父子生厭羈旅

又

胡鴈依朔風羣飛逐南翔
游子方北征朔風吹我裳攬
轡望雲間夜色正蒼蒼
空羨南歸翼幽懷增感傷

過漢江

西極鰲足折東南地維傾衆流競趨下
涵涵歸滄溟誰能跨明河挽此經
天行世難乘槎翁此意終冥冥

新湖夜行

平湖淨無瀾天容水中煥浮舟跨雲行
冉冉躡星漢烟昏山光淡梔動林鴉散
夜深宿荒陂獨與雁為伴

哀鴻

哀鴻常苦饑悲鳴垂其翼朔漠晚霜寒
江湖晚烟暮乾坤一網罟高飛亦何益
日暮無與羣驚風暗沙磧

枕上

小智好自私小德常自足
自私開人賊自足心有瑕
瑜不相掩君子比良玉
默默枕上思戒之在深篤

龜山集卷三十九

欽定四庫全書

龜山集卷四十

宋 楊時 撰

詩三

五言律

別游定夫

龜勉吾將仕謀身力已分
漆雕慙未信子夏又離羣
慘淡交情重間關道路勤
至言宜遠寄孤陋願頻聞

過金山

環望荆吳圻清江日夜流
飛騰潮汐浪漂泊利名舟
山湧鰲番出樓噓蜃氣浮
僧窻千古意出沒看輕漚

冬曉

著瓦霜華冷暝空曉霧均
氣昏難見日風過易生塵
洗硯冰紋破憑鑪火色春
莫嫌寒尚薄雨雪更愁人

雨寒

天幕陰雲積蕭蕭雨正霑
泥污闕市寂水入御溝深
破屋寒侵骨哀絃凍絕音
更愁風力健瘦怯不能禁

歸雁

天木驚風急江湖夜思長
悲鳴愁絕塞接翼冒清霜
澤岸多繒弋雲間乏稻梁
茫然栖息地飲啄欲何傷

感事

世事浮雲薄勞生一夢長
散材依櫟社幽意慕濠梁
風激鷹鷂迅霜殘草木黃
投閒如有約早晚問耕桑

過關山

牢落關山路年來倦往還
長隨流梗泛有愧白雲間
親

遠江天外魂勞夢想間
泣然遊子淚挹盡復沈瀾

又

歲律行將暮颼風凌九垓
山深人寂寞路遠馬虺隤
幽意從誰展愁懷殢酒開
衰遲仍惜日投晚獨徘徊

晚泊遇雪

向晚驚風急飄零雪滿垓
氣升雲幕幕天遠月冥冥
寒色終無賴豐年漫寄聲
舖糟吾不慣彊醉復還醒

又

寒逼歸鴻急悲鳴聲更哀舞風斜翳日帶月暗欺梅平
野光初合陰雲凍不開無聊還殢酒顛倒盡餘盃

偶成

天遠何須問勞生聽若何犁鋤三畝足栖息一枝多白
雪寧堪冒清時只浪過好尋明月影醉舞自婆婆

臨川驛偶成

冉冉朝仍暮蕭條官舍幽閉門三尺雪觸物一虛舟蟲
蠹生涯盡萍漂世事浮尚思方技學多病未能休

除夜感懷

臨川驛

歲律已云盡思家日日深二年為客恨千里倚門心節
物羅樽俎兒童學語音眩然如在目恍惚夢難尋

又

愛日乖予願親顏長在心遠遊仍換歲華髮想盈簪永
夜誰同席殘盃憶共斟相思空有淚揮洒滿衣襟

臨川道上

風雨離山驛斷橋危欲顛去心奔逸驥行路上青天雁

序江湖樂雲歸島嶼連悠悠遠征客千里獨茫然

旅舍書事

懶拙乖時尚支離與世殊饋漿驚御寇避席愧陽居觸
事紛難解忘形色易鋤不須修混沌機械本來無

過清溪渡

天闊江街雨冥冥上客衣潭清魚可數沙晚鷗爭飛川
谷留雲氣鷓鴣傍釣磯飄零滄海客期到一帆歸

泛江至土坊

萬頃江湖遠，孤乘一葉船。
雁飛雲外字，篷掩水中天。
波靜櫓聲息，風微帆影偏。
回環聊注目，浩蕩接清烟。

秋日有懷寄從弟表民

丁伯父憂

羈旅吾方困，哀思汝正煩。
望雲愁雁序，回首憶鵷原。
北圃蔬還盛，東軒菊想繁。
飄零不相見，沾灑獨忘言。

和潭倅張朝請行縣言懷

夾道旌麾動，陰霾萬里開。
霜迎威令肅，春逐馬蹄來。
幽壑光初滿，寒葦暖自回。
仰窺嵩華質，曾未施纖埃。

又用前韻和早梅二首

楚國春歸早寒梅處處開
月和清艷冷天與靚粧來東
閣詩魂動南枝歲律回
蕭然冰雪態無處覓輕埃

又

星馭經行處梅花忽已開
只疑春信早先擁使旌來嫩
萼紅初破寒柯綠未回
凌霜半含月皎皎絕纖埃

感事

邊徼無虞日王師討弗庭
收功誇廟筭行險毒生靈川

谷旌麾暗風塵戰血腥寂寥歸馬日目斷華陽垆

又

虎士冰河側日聞刁斗驚氣吞沙漠盡風蕩賊巢傾關
塞長年戍邊塵幾日清太平陳朽富一旅百夫耕

泗上

聞將閉
汴口

淮口平沙漲檣烏向日斜微雲變蒼狗輕浪覺浮花風
勁回飛鴈林喧集暝鴉河流應未閉遲我到京華

又

鬢蓬凋欲盡岸憤任敲斜病覺寒裘重慵嫌細字花凍
雲穿曉日晴樹繞飛鴉老大驚遲暮飄零惜歲華

又

聞道河流閉逢人每問津天高雲幕幕風細水鱗鱗未
種江陵橘空思千里萼且邀明月伴相對解綸巾

出京

己卯歲
九月

旅泊驚秋意塵沙變客衣明星爛河漢殘月暗簾帷風
柳斜斜轉雲帆片片飛窮愁添別病衰晚意多違

言溪早起

短日催征轡聽雞踏曉霜遠山頻入望薄酒漫搜腸湘
浦蓴絲滑吳淞鱸縷長何時一踈放把釣卧滄浪

漢坂舟行

曲岸通幽徑疎籬映竹斜塢深藏吠犬林薄露人家石
瀨魚偏美鄰村酒易賒祇應雲水富自是一生涯

席太君挽辭二首

賢配無前古傳家有子賢四靈來薦瑞一鶚已摩天蒿

里迷長夜悲笳慘暮烟蕭蕭原上路猶想駕雲駟

又

稟粹猗蘭秀來嬪洛水濱一窺識公輔三徙得儒真畫
翼流雲氣松阡卧石麟哀榮今日事誰復繼前塵

湘君祠

鳥鼠荒庭暮秋花覆短牆蒼梧雲不斷湘水意何長澤
岸蒹葭綠籬根草樹黃蕭蕭竹間淚千古一悲傷

鄒公輓辭二首

一伏青蒲上三年瘴海濱泉甘不出戶

公謫南方所居無水庭中忽湧

甘客醉豈無神

公在謫所忽有醉客言公將歸翼日赦至果得歸

報國心長在

知恩志未伸

公所居堂名知恩

追懷垂絕語空有淚盈巾

又

舊德今誰在凋零已不多雲天開日月陸海自風波空

歎與齡夢難留曳杖歌平生濟川意無處問施羅

公嘗有與

齡之

夢

龜山集卷四十

欽定四庫全書

龜山集卷四十一

宋 楊時 撰

詩四

七言律

登桐君祠堂

昔有隱者結廬於此人間其姓指桐樹示之故號桐君

霜染溪楓葉葉丹翠鱗浮動汐波閒
盤盤路轉千峯表
冉冉雲扶兩腋間
掠水輕鷗晴自戲
凌風飛鴈暮爭還
結廬姓字無人會
靜對庭陰一解顏

巖松

娑娑千尺倚巖巔
隱隱虬姿拂遠烟
尤喜地靈泉脈潤
獨愁天闊晝陰偏
孤根礙石盤彌固
直榦凌霜老益堅
臃腫不須逢匠伯
散材終得盡天年

和鄭商老下第

雨餘新惹一番愁
展轉衾寒客思悠
獻璞又添今日恨
登科空負昔人羞
林泉水石君先到
京國風塵我尚留
若為浮名苦憔悴
前春行釣巨鰲頭

穎昌西湖泛舟

游賈丞相
曲水園

扁舟乘興漫追尋
路轉河回入柳陰
拂面落花春事盡
避人幽鳥野情深
慚無健思供吟筆
賴有寒光映客心
日暮倚風歸棹急
一鉤新月掛瑤岑

春過鶯花無處尋
移舟行近古城陰
寨衣水上收殘片
傾耳枝間覓好音
山隔曲堤迷遠近
魚跳文藻亂浮沉
飄然自得江湖趣
陡起歸與萬里心

送丁季深

烟含疎柳綠蒙茸杏頰桃英入眼紅邂逅與君逢臘雪
飄零獨我過春風空愁轉轂音塵遠且寄離懷笑語中
後夜月明人寂寂相思那復一樽同

蘄州早起

城頭雷動角聲哀似共行人怨落梅欲報晨炊梁未熟
喚回殘夢眼驚開霜清暗覺貂裘冷月淡空令邑犬猜
倚杖起看風正慘紫薇繚繞俯三台

合江亭晚眺

倚杖鉤簾兩水間
晴光飛影上雕欄
帆催畫鷁搏風去
雪吐銛鋒作劍攢
平野烟浮迷遠目
晚溪潮漲失前灘
騎鯨一往扶桑近
休問人間行路難

含雲晚歸寄真師

每扣禪關即晚歸
塵中回首萬緣非
不愁幻翳迷心地
且聽潮音振祖衣
歸路往來無別徑
夜光清徹有餘輝
虎溪舊社知重約
陶令如今已息機

遊玉華洞

蒼藤秀木遶空庭，疊石層巒擁畫屏。
混沌鑿開幽竅遠，巨靈分破兩峯青。
雲藏野色春長在，風入衣襟酒易醒。
採玉遺蹤無處問，擬投簪紱學仙經。

次韻思睿見寄

聖賢千古愧難攀，力學方憂敢自閒。
顧我久拋聲迹外，慚君猶掛齒牙間。
平生拙計心長在，解帶高風志未還。
捧檄于今非得已，漫勞魂夢遶溪山。

次韻蔡武子書懷

放形鋤色恐成光
斲堊能令臭不傷
自信放魚真得計
却憐挾策亦亡羊
刀投有間多餘地
語到無言輒自忘
擾擾世紛何足問
松窻終日獨彷徨

感懷寄鄉友

時在處州

漫浪人間已十年
簿書擾擾日羈纏
朱公漫有千金壁
季子初無二頃田
籬下蹲鴟餘晚實
雲間紫鼈奮新拳
淹留寸祿空回首
一望鄉關一悵然

贈致政楊孟堅宣德

孟堅歷三世不改官而諸子各有第宅故以楊陸為

比

子雲論薦有王音

孟堅累為
達官所薦

陸賈年來老境侵自守一

官歷三世退令諸子分千金平生器業成幽夢白首功
名負壯心賴有新詩輕萬戶未須投紱嘆堙沉

廣文官冷竟誰憐空負才名四十年

孟堅及第
已四十年蕭散欲

尋濠上侶飛揚還作酒中仙龍章繡紱榮何在鶴氅綸
巾靜自便遙憶瀨溪風物好勝遊應不愧斜川

寄湘鄉令張世賢

身游羿彀偶相逢安得初終若駟蛭道學未容窺閫奧
吏師應許叩隣封蕭條此意君誰問落拓微官我更慵
盧白回旋真戲事傍觀無用氣填胸

縣齋書事

朱顏凋盡鬢鬢鬚世路低回老益慚偶影獨游聊自適
談書不輟竟何堪神爐默默金徒踊

一作天君默
然情何在
螳蛭

紛紛夢正酣誤把此身撻世網自纏徽纆信如螭

次韻錢帳計

駸駸義馭定難羈過隙跳九日夜馳但見光陰如掣電
却尋稽覽已當期飛黃汗血宜千里秋鷲乘風此一時
芝草鳳凰真美瑞清名應有退之知

和張倅行縣

江浮疊嶽弄清輝雲外冥鴻江上歸擊目自多幽興在
揮毫時見彩牋飛應愁零雨侵星駕好為援戈却晚暉
帝室正須調鼎萬勒移寄語不須譏

遊光大寺示犀老

山橫杳靄有無中，疊觀層臺一梵宮。
萬軸琅函方杜口，數聲啼鳥正談空。
溪雲抱影侵行屐，香篆飛烟襲晚風。
薄宦羈人如接摺，自慙來往苦匆匆。

王簿清輝亭

黛染烟螺拂檻低，抱城流水綠逶迤。
澄瀾碎影搖青鏡，斜日流峰隱半規。
坐上盈樽無俗客，壁間照夜有新詩。
登臨已動忘歸興，况復清談足解頤。

寄長沙簿孫昭遠

時以不催
積欠被劾

陽城衰晚拙催科闔寢空慙罪亦多祭竈請隣君自適
載醪祛惑我誰過猗猗庭有蘭堪佩寂寂門無雀可羅
歸去好尋溪上侶為投纓紱換漁蓑

安禮以宏詞見勉奉寄

吏部文章世所珍終慙無補費精神浮名膚外增餘贅
薄宦戈頭寄此身養志吾方同邨曼談書誰復問山賓
自憐坐頃三遺矢衰晚那能用楚人

秋晚偶成二首

纖纖晚雨洗秋容
庭樹蕭然策策風
萬籟自鳴羣物外
四時長在不言中
坐臨流水襟懷冷
卧對浮雲世慮空
寂寞一廛吾自適
客嘲從更議揚雄

風飄浙瀝開諸隣
却掃衡門溷世塵
天氣清明秋意態
夜光浮動月精神
流年漸覺侵雙鬢
生理從來付大鈞
臨水便同濠濮趣
翛然魚鳥自親人

席上別蔡安禮

子方赴闕安禮
赴博羅任

故里相看眼暫明
一尊聊此話平生
杜陵苦被微官縛

元亮今為世網櫻長路關山吾北去春風梅嶺子南征
結隣一作廬莫負當時約早晚滄浪共濯纓

次韻安禮見寄

末俗相看老尚新交游千里更誰親蕭條身世聊安分
迂濶行藏懶徇人宦路競羞關柝吏勞生誰息利名身
我慙抱甕無機械幽興惟思水石濱

冬寒兩齒忽覺動搖因成書懷

未年三十髮先彫歲晚俄驚兩齒搖都為踈慵成計拙

直緣衰病覺形焦，連經宿雨重裘冷。
旋煮藜羹野興饒，擺脫塵樊猶未得。
不堪回首問漁樵。

書懷

駸駸塵土久方還，直道謀身力愈難。
靖節每嗟嬰世網，漫郎何意出人間。
風驚駭浪潛鱗伏，竹隱灣磯翠羽閑。
好去杖藜穿蠟屐，伴雲隨月弄潺湲。

汗上

聞開
月堤

天上行雲曳白衣，半銜晴日在林扉。
盤花落雁驚鷺起。

啄食饑鳥趣不飛榆莢青錢飄已盡月堤流水澹相圍
征途處處塵隨眼多病長年與世違

陳留書事

烏檣風纜欲飛翻拍岸驚濤挽不前曲浦漲沙仍積凍
疎林斜日自生烟崎嶇道路真堪笑放浪江湖已判年
一枕晝眠無好夢空慚邊老腹便便

予自長沙還植蘭竹於東西軒調官京師逾年
而歸蘭竹皆衰悴感而成詩

己卯

柴桑衰晚愛吾廬三徑歸來手自鋤但得叔卿長飽飯
不妨孝若老談書蘭因採佩枝先瘁竹為凌霜花自踈
留骨廟堂寧曳尾魯門無用祀爰居

和李倅游武夷

濃淡烟鬟半雨

一作雨半

晴溪光初借晚霞明黿頭湧出三

峯秀

三層峯最為秀拔

天漢融成一鑑清

魏王峯頂有天鑑池

粉社有誰

藏舊牒賓雲無處問遺聲幔亭寂寞仙何在勾漏丹砂

早晚成

荊州書事二首

江湖泛泛一虛舟，去作人間浪漫游。
歲晚光陰雲冉冉，畏途風雨日浮浮。
萬鍾信是樊中雉，一棹聊同水上鷗。
投老蘼鹽一作簿書成底事，憑誰為種橘千頭。

千里瀕江地，可毛結廬。何必故山椒，載醪不過斜川路。
飲水誰同陋，卷瓢勿問雞蟲閒。得失但知鷓鴣各道遙。
黃塵滿眼僧窻靜，坐對風花意已消。

天寧節

祥開若木射瑤光
淑氣先春景自長
玉陛風閒飛綵綬

獸爐烟暖襲珠囊

千秋節賜綵綬珠囊
民間以此相饋遺

雲門羽鶴儀仙

仗天上蟠桃薦壽觴
已見晶輝環帝座
定應長照鼎宮

傍

鼎宮傍一星
人主壽星也

閒居書事

虛庭幽草翠相環
默坐頽然草色間
玩意詩書千古近
放懷天地一身閒
踈窻風度聊歌枕
永巷人稀獨掩關
誰信紅塵隨處淨
不論城郭與青山

直舍大風書事寄循道

枕書無寐首空搔，萬竅噓風正怒號。
雪意浮空迷遠目，月林踈影見秋毫。
幽庭所藉惟荒草，妙理應須付濁醪。
誰念維舟江上客，落帆千里壓雲濤。

和席季成遊金鑾寺

朱甍碧瓦照孤城，杖屨翛然野色清。
穀捲水風輕蕩漾，珠翻荷雨自虧盈。
勝遊已覺非人境，妙語寧須闕玉英。
願借金篔脚，刮目不容幻翳有纖萌。

送王充道游三茅廬阜

荆吳相望各天涯，千里柴車鹿自隨。
解纜定應春盡日，

及歸宜待鶴來時。

三茅中峯每歲八月十七日有鶴至充道當候見物乃可回

聖賢

莫負樽中綠，日月長為物外遲。
若過匡廬訪真隱，卧龍

菴下有期頤。

卧龍庵有劉道人言百歲壽

春日有懷諸友

憑几無聊晝掩扉，芬芬晴氣減春衣。
隔簾相應鶯初語，背日連飛鴈北歸。
莫逆交遊千里別，遠來音信兩年稀。

追尋舊事成幽夢觸物心行事事非

望湖樓晚眺

斜日侵簾上玉鉤簷花飛動錦文浮湖光寫出千峯秀
天影融成十里秋翠鷗翻風窺淺水片雲隨意入滄洲
留連更待東窻月注目晴空獨倚樓

次韻晁以道

庚寅年
出京

誰能載酒尋元亮共寄一作把無何作醉鄉便好收心事

農圃不須驚世露文章壺中日月春長在塞上烟塵客

自忙千里同風無遠近未分秦隴與瀟湘

和錢濟明游官園

常州

虛舟觸物本無意看花得句慚非才名園古寺尋春色

不暈勿鄙雙魚鯉

是日與濟明遍遊諸平諸院觀雙魚花抵暮至官園

木奴千頭

比封戶秋實付與江風催因思萬點愁人處何似洞庭

金作堆

蘇子美詩洞庭柑熟客分金

過吳江

天水相涵翠有餘玻璃萬頃接方壺山浮晚照清如洗

風遠飛帆細欲無漫叟未應甘皂櫪散人終欲傲江湖
維舟况值鱸魚美鱠疊銀絲飲腹腴

南歸書事

浪漫人間壓客塵衡門長憶鎖榆枌忘言擬盡輪人妙
陳迹慵尋史籀文萬里功名心獨冷一廛耕鑿力能勤
舊游欲問南歸趣寂寞吾今過子雲

寸碧軒

隱隱遙山列畫屏簷間寸碧與雲平
低回席上遺簪露

彷彿牆東翠黛橫
虛景遠涵千里色
晚暉仍借一溪清
春風景物知多少
可稱收身樂此生

冬早書事

窈冥誰為宰
爐錘榮謝唯
知歲序催
臘日未經梅
已綻
春風尚遠凍
先開
愁無潤澤歸
芳樹
獨有餘寒著
死茲
收盡浮雲天
愈淨
夜深猶起望
三台

齒落書懷

身上蕭條事事空
齒牙凋落賸衰翁
渴心尚欠冰凌解

病骨長思藥力攻
文几倦親塵土暗
斷編慵理蠹魚封
南牀穩卧陶公宅
枕上悠揚一榻風

龜山集卷四十一

欽定四庫全書

龜山集卷四十二

宋 楊時 撰

詩五

七言絕句

書懷

少作

敝裘千里北風寒
還憶簞瓢陋巷安
位重金多非所慕
直緣三釜慰親歡

端午日

少作

悠悠南北各天涯
欲望鄉關眼已花
憶得親庭誰共語
應憐遊子未還家

渚宮觀梅寄康侯

欲驅殘臘變春風
只有寒梅作選鋒
莫把踈英輕鬪雪
好藏清艷月明中

勉謝自明

少年力學志須彊
得失由來一夢長
試問邯鄲歌枕客
人間幾度熟黃梁

臘月見桃花

脂臉輕勻作艷粧
未應潔白似梅香
天紅不見凌霜操
漫向春前取次芳

過蘭溪

紛紛朝市競秋毫
江上霜風正怒號
不問揚瀾與彭浪
翩然東下日千艘

夜雨

似聞疎雨打篷聲
枕上悠揚夢半醒
明日覺來渾不記

隔船相語過前汀

重經烏石鋪

夾屋青松翠靄中
去年經此亦匆匆
重來烏石岡頭路
依舊松聲帶曉風

江上

寒雲暮冪結秋陰
月淡霜娥冷不禁
更祝江波休蕩漾
莫令清影碎浮金

淮上獨酌

廉纖晚雨洗輕塵
天淡雲浮夜色新
賴有麴生風味好
不須邀月作三人

吳國華暗香亭

漫愁青女妬新粧
已有風傳處處香
試問隱淪溪上客
欲將春色若為藏

虛心亭

山橫鰲背碧巔岫
亭對浮筠縹緲間

拾遺記蓬萊山有浮筠之幹葉青莖紫

蕭散誰為三徑侶
祇應長共白雲閒

容照巖

清時投迹在嶽峯一穴晴光破晚陰
刺草未容忘魏闕
故應長有子牟心

藏春峽

山銜幽徑碧如環一壑風烟自往還
不似武陵流出水
殘紅那得到人間

綠陰亭上

吳先生家

沙邊幽鳥傍清漪瀧下漁船逆浪歸
身在輞川圖畫裏

晴空惟欠雪花飛

病中作

通衢隔轍斷經過門巷空無雀可羅
驅去兒童卧虛室
蕭然惟一病維摩

春波亭上

城頭飛蓋映朝暉向晚遊人興未移
安得魯陽酣戰手
為留羲馭更遲遲

安禮以宏詞見勉因成絕句奉寄

萬鍾身外一牛毛
斗祿紛紛漫自勞
窮酒寧為獮獺笑
未容仰首試鳴號

感事

桑麻腴地莽榛荆
騎士西來劍戟腥
藜藿陋儒心更鄙
但思干羽舞虞廷

藍田溪上

夾籬桃李趁溪斜
淺淺清流映落花
欲問武陵源上路
度雲穿石認胡麻

白公草堂

爐峯裊裊曉烟輕
雲入屏幃一枕清
高興自應無世界
獨於妾馬未忘情

久旱

農郊阡陌起黃塵
望斷天涯絕點雲
踈懶無情訟風伯
幽窻時讀退之文

過七里瀨

拂雲高鴈倚風搏
下視平湖萬里寬
搔首扁舟又東去

錢塘江上看波瀾

扁舟東下幾時還
一席飛帆插羽翰
回首嚴陵臺上月
清風千古逼人寒

勉懷

紛紛於我未忘情
踈懶多應捨怨憎
便好世間師柳惠
不須巖下問繇登

梭山候潮

十一日潮起信
是日潮小不到

向晚牛羊沙岸歸
落帆烟浦候潮時
誰言江上須忠信

潮到于今自失期

徐郎廟

古廟靈塲枕碧巔
松楸依約鎖風烟
羽毛一去無消息
墮落人間幾百年

送陳幾叟南歸

三首
丙戌年

連牆東郭倦追尋
高卧毗耶老病侵
自愧屠龍真拙技
漫令吾子費千金

霾風霖雨濕征裾
隔雨樓臺半有無
南去定逢韓閣老

歸愚當見問夷塗

是時幾叟過
四明見了翁

幾年夢想到親闈
身遂行雲萬里飛
苔水未殊沂上樂

春風無負舞雩歸

初授
餘杭

和陳瑩中了齋自警言六絕

畫前有易方知易
歷上求玄恐未玄
白首紛如成底事

蠹魚徒自老青編

八荒同宇混車書
一視那知更有渠
憑軾自應由砥道

徑蹊無處問歸與

行藏須信執中難時措應容道屢遷一日全牛無肯綮
駭然投刃用方安

造次欲安嗟孰是參前無物若為書蕭條此意人誰問
興廢由來命也與

聖門事業學須彊俚耳從來笑折揚說遇得禽非我事
但知無有是吾鄉

盈科日進幾時休到海方能止衆流只恐達多狂未歇
坐馳還愛鏡中頭

附了翁自警

本無一字堯夫易八十一篇揚子玄今古是非那復
辨仲尼尤不廢韋編

文章難寫伏羲書字外成篇始見渠賜也能分可不
可一瓢居士只如愚

過時不易始為難執處那知是變遷度盡千山無鳥
迹不勞傳語報平安

手在何憂弓力彊巧窮那得必穿楊太和有味人人

飲誰識醒時是醉鄉

仲由行行終身誦師也堂堂帶上書五柳却能知此
意無絃琴上賦歸與

只說為山不說休山成日夜水橫流惜哉覆簣成迷
復只欠當初一掉頭

閒居書事

輕風拂拂撼孤檉庭戶蕭然一室清隔葉蟬鳴微欲斷
又聞餘韻續殘聲

送席二

伊川塔

摠衣丈席想多聞高節應能與俗分不用卑飛入幽谷
定知喬木在青雲

寄游定夫

在潁昌從
明道先生

絳帷燕侍每從容一聽微言萬慮空却愧猶懸三釜樂
未能終此挹清風

蕭條清潁一茅廬魂夢長懷與子俱五里橋西楊柳路
可能鞭馬復來無

含雲寺書事六絕句

獸駭禽鳴翳蔚中
難將此意問鴻蒙
縈回小徑蒼苔滑
杖屨從今恐不通

北山山下一漁翁
形解心凝骨已融
支枕睡餘人寂寂
一軒明月滿窻風

山前咫尺市朝賒
垣屋蕭條似隱家
過客不須攜鼓吹
野塘終日有鳴蛙

夾屋青松長數圍
午風搖影舞僛僛
幽禽葉底鳴相應

時引

一作
曳

殘聲過別枝

竹間幽徑草成圍
藜杖穿雲翠滿衣
石上坐忘驚覺晚
山前明月伴人歸

蝶夢輕揚一室空
夢回誰識此身同
窻前月冷松陰碎
一枕溪聲半夜風

荷花

照眼紅雲鬪晚霞
重重青蓋半傾斜
會須直跨三千仞
移取峯頭十丈花

宜春溪

斜斜踈柳照清漪
藉藉殘紅自滿蹊
刺眼藤稍牽不斷
欲尋流水路還迷

宜春道上

艷杏天桃日日稀
空餘淑氣尚遲遲
誰人為作留春計
莫放風花自在飛

過豐城

清江渺渺綠浮天
博物無人繼昔賢
應有斗間靈氣在

誰能更與斲龍泉

瀏陽五咏

洄淵浩蕩白鷗飛老懶時來坐釣磯
岸噴行人聊自適不應憔悴似湘縲
右渭水

簾捲晴空獨倚欄冥鴻點點有無間
秋風注目無人會時與白雲相對閒
右歸鴻閣

芙蓉彫盡蕙蘭芳杖屨翛然一漫郎
鳧鶴短長寧復一作

無足問但知鷓鴣兩相忘
右飛鷓亭

柔條踈蔓綠交加
烟鎖雲涵去路賒
繡紱貂纓無處問
空餘雞犬兩三家
右相公臺

聖童去後水雲門
陳迹難尋草木間
獨有微言傳逸史

洞天寂寂

一作從此

在人寰

右洞陽

孫思邈修真所

縣齋書事

簿書投老豈身謀
朱墨紛紛晚即休
平世功名歸稷禹
一瓢吾欲慕巢由

一去人間二十年
空餘飛雪上華顛
清時最有求田樂

未愧陳登榻上眠

身名於我兩悠悠形影相忘懶贈酬擬把一竿滄海去

飄然清世一虛舟

一作不應沙
上有鷺鷥

醴陵丁君洋洋亭

依蒲泳藻兩相忘宛有江湖氣味長
凭檻脩然真得計
祇應幽興在濠梁

安西聞捷

三首
呂吉甫持節

鷹揚塞外得非熊
萬里金城一箭通
玉帳投壺隨燕豆

坐看飛將縛驍戎

將軍新擁節旄閒紫塞雲浮豹尾班
白首邊城休悵望
馬蹄未出玉門關

雅歌不待來天馬謝質今應閉玉門
早勒勳名上彝鼎
放回春色滿乾坤

出尉氏

隔林殘雪弄輕風日射晴光玉縷紅
桃杏渾如梅欲綻
直疑身在故園中

感事

權門車馬日紛紛
寂寞多應笑子雲
玄白定知非世尚
解嘲那復彊云云

過廬山遇雨

江風吹雨逐人來
行過山前首重回
絕頂隔雲看不見
石稜崖角獨崔嵬

題詩長老壁

維摩病士意超然
邊腹便便但晝眠
共說平時忙底事

烹茶煮藥過殘年

東林道上閒步三首

寂寞蓮塘七百秋
溪雲庭月兩悠悠
我來欲問林間道
萬疊松聲自唱酬

百年陳迹水溶溶
尚憶高人寄此中
晉代衣冠誰復在
虎溪長有白蓮風

碧眼龐眉老比丘
雲根高卧語難酬
蕭然丈室無人問
一炷爐峯頂上浮

江上夜行

赴荆南道

冰壺激灩接天浮，月色雲光寸寸秋。

古別離云：碧澗之下，寸寸秋色。

不用槎，駕東海，一江星漢擁行舟。

過石首謁縣官回有作

壬午十一月

萬事紛紛醉即休，無功可作酒泉侯。
誰能載取千缸去，且向舟中打拍浮。

直舍書事

鱗鱗池面水初生，萍底青蛙自在鳴。
誰使幽庭當鼓吹，

雨餘時聽作新聲

登峴首阻雨

時自荆南入京

羊公風績幾經秋，獨遶龜趺為少留。
欲問荆人尋舊事，一江清泚自東流。

江浮雲影抱層欄，雲外青山一水間。
盡日倚闌看不足，杖藜欲去更回還。

江風飛雨上雕欄，庭樹蕭蕭景自閒。
向晚微雲遮不盡，好山渾在有無間。

庭前古木已經秋天外行雲暝不收倚杖却尋山下路
一川風雨濕征輶

春早

雲天暮暮漏微光踈懶惟添睡思長枕上隔籬聞鳥語
半殘春夢更悠揚

此身如幻病何傷白日無人景自長寄傲南窻容膝地
時時飛夢一作清夢到羲皇

過簷赫日晝如燔睡轉庭陰始一反縱有諸人來問疾

昆耶居士已忘言

寄形一榻日遽然倚杖支頤髻指天莫逆過門無子祀
時來鑑井自踟躕

古椿朝菌已忘年貧病寧須更問天石彈不妨隨物化
自求鴉炙自應便

病起

竹風帶雨作秋聲半睡惟聞鳥雀爭老病衰殘惟骨立
白頭看鏡不須驚

題陳宣事烟波泛宅

忘懷纓紱寄浮居
來泛烟波擬釣徒
我欲他時清洛上
為君正櫓作緇緇

偶成

綠髮潛驚老境催
更憐衰病困低回
但知周道平如砥
莫問瞿唐滌預堆

悠揚春夢成幽興
冷落溪光照酒卮
天闊雲浮遮不盡
浪平風過舞連漪

乾
坤
廣
濟

龜山集卷四十二